

Na osnovu člana 16. stav 2. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10) i tačke VI. Odluke Vlade Federacije Bosne i Hercegovine o davanju saglasnosti za prihvatanje granta Evropske banke za obnovu i razvoj (Investicijski grant iz Regionalnog programa za energetske efikasnost za Zapadni Balkan (REEP)) Projekat „Poboljšanje energetske efikasnosti u JU Kantonalnoj bolnici Zenica“ („Službene novine Federacije BiH“ broj: 60/18), na prijedlog Ministarstva finansija Zeničko-dobojskog kantona, Vlada Zeničko-dobojskog kantona, na 120. sjednici, održanoj dana 09.09.2021. godine, d o n o s i

ODLUKU

O DAVANJU SAGLASNOSTI ZA PRIHVATANJE GRANTA EVROPSKE BANKE ZA OBNOVU I RAZVOJ (INVESTICIONI GRANT IZ REGIONALNOG PROGRAMA ZA ENERGETSKU EFIKASNOST ZA ZAPADNI BALKAN (REEP)) ZA PROJEKAT POBOLJŠANJE ENERGETSKE EFIKASNOSTI U JU KANTONALNOJ BOLNICI ZENICA

Član 1.

(Prihvatanje granta)

Vlada Zeničko-dobojskog kantona u ime Zeničko-dobojskog kantona (u daljem tekstu: ZDK) prihvata grant namijenjen za finansiranje Projekta „Poboljšanje energetske efikasnosti u JU Kantonalnoj bolnici Zenica“ (u daljem tekstu: Projekat), po Ugovoru o grantu zaključenom između Bosne i Hercegovine (u daljem tekstu: Država) i Evropske banke za obnovu i razvoj (u daljem tekstu: EBRD), koji se odnosi na investicioni grant iz Regionalnog programa za energetske efikasnost za Zapadni Balkan (REEP) za Projekat, u iznosu do 1.000.000,00 EUR-a.

Član 2.

(Namjena sredstava granta)

(1) Sredstva granta iz člana 1. ove odluke koristit će se za realizaciju Projekta poboljšanje energetske efikasnosti u JU Kantonalnoj bolnici Zenica.

(2) Osnovni cilj i svrha Projekta je izgradnja novog termoenergetskog bloka, mašinske instalacije i utopljavanje objekata JU Kantonalne bolnice Zenica.

Član 3.

(Potvrda prihvatljivosti dokumentacije)

Vlada Zeničko-dobojskog kantona potvrđuje da je dokumentacija prihvatljiva za ZDK, a posebno:

- a) nacrt Ugovora o grantu između BiH i EBRD-a i
- b) nacrt Podugovora o grantu/Sporazuma o pod-grantu između FBiH i ZDK.

Član 4.

(Realizacija Odluke)

(1) Za realizaciju ove Odluke i izvještavanje zadužuju se Ministarstvo finansija Zeničko-dobojskog kantona i JU Kantonalna bolnica Zenica, svako u okviru svoje nadležnosti.

(2) Odluka će se dostaviti Federalnom ministarstvu finansija-financija na dalje postupanje.

Član 5.

(Donošenje novih zakona)

Implementacija Ugovora o grantu iz člana 1. ove odluke ne zahtijeva donošenje novih ili izmjenu postojećih zakona.

Član 6.

(Potpisivanje Podugovora o grantu)

(1) Daje se saglasnost za zaključivanje Podugovora o grantu/Sporazuma o pod-grantu između Federacije i Zeničko-dobojskog kantona za sredstva iz člana 1. ove Odluke.

(2) Ovlašćuje se premijer Zeničko-dobojskog kantona za potpisivanje Podugovora o grantu/Sporazuma o pod-grantu između Federacije i Zeničko-dobojskog kantona za sredstva iz člana 1. ove Odluke, kao i svih drugih ugovora, sporazuma, mjenica, mjeničnih ovlaštenja i drugih akata potrebnih za realizaciju navedenog Projekta.

(3) U slučaju nenamjenskog utroška sredstva i eventualnih neispunjenja obaveza po Podugovoru o grantu koje bi mogle imati finansijske obaveze po Federaciju, ZDK se obavezuje da će u svrhu naplate svih tražbina po Podugovoru, Federaciji dostaviti bjanko mjenice, kojim ZDK ovlašćuje Federaciju da primljene bjanko mjenice može koristiti za naplatu dospjelog potraživanja.

Član 7.

(Stupanje na snagu)

Ova odluka stupa na snagu danom donošenja i objavit će se u „Službenim novinama Zeničko-dobojskog kantona“.

PREMIJER

Mirnes Bašić

Broj: 02-11-12224/21

Datum, 09.09.2021. godine

Zenica

DOSTAVLJENO:

1x Ministarstvo finansija,

1x Ministarstvo zdravstva,

1x Federalno ministarstvo finansija,

1x JU Kantonalna bolnica Zenica,

1x „Službene novine Zeničko-dobojskog kantona“,

1x a/a.